

Uunga siunnersuut:

Nunanit allanit aningaasaliinerit ilaasa misissorneqartarnissaat pillugit Inatsisartut inatsisaat

Siunertaq

§ 1. Aningaasaliinerit taamaattut misissornerisigut aamma akuliuttoqassappat akuliunnikkut, nunanit allanit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerisa pitsaaliorneqarnissaat, Inatsisartut inatsisaata massuma siunertaraa.

Atuuffissaa

§ 2. Nunanit allanit aningaasaliinerit, nunat allamiut aningaasaliisartuinit aningaasaliissutigineqartussatut eqqarsaatigineqartunut imaluunniit naammassineqartunut, Inatsisartut inatsisaat manna atuuppoq.

Nassuiaatit

§ 3. Inatsisartut inatsisaanni matumani tulliuuttut ima paasineqassapput:

1) Immikkoortortaarfik: Iluseq aaqqissuussinnermut atorneqartoq apeqqutaatinnagu, suliffeqarfiit inuussutissarsiutillit aamma suliffeqarfiit inuussutissarsiutiginnagu suliffeqarfiusut tamarmik, pisortani oqartussaasut, aningaasaateqarfiit, peqatigiiffiit, sullissiviit il.il.

2) Kalaallit Nunaata isumannaatsuunissaa: Pissutsit Kalaallit Nunaata nunakkut, immakkut imaluunniit silaannakkut killeqarfiisa innarligassaannginnerannut innuttaasullu ataannarnissaanut tunngassuteqartut, Kalaallit Nunaata isumannaatsuunissaanut navianartorsiortitsinerit ilaatigut iliuutsinik, atassuteqarnerit akornusersorneqarnerannut, aamma iliuutsit, Kalaallit Nunaata ajoquserneqarnissaanik siunertaqartut, uani imaritinneqarput.

3) Tamat toqqissisimatinneqarnissaat: Pissutsit, matumuuna Kalaallit Nunaata isumannaatsuunissaanut sunniuteqartinnagit, Kalaallit Nunaata, inuinnaat naalakkersueqataanerannut aamma inuiaqatigiit isumannaatsuunissaasa attassinissaanut tunngassuteqartut.

4) Nunanit allanit aningaasaliineq:

a) Immikkoortortami Kalaallit Nunaanni angerlarsimaffeqartumi, piginnittutut piginneqataassutinik imaluunniit taasisinnaatitaanermik minnerpaamik 25 pct.-iusunik toqqaannartumik imaluunniit toqqaannanngitsumik pigisaqarnermik imaluunniit pissaaneqarfeqarnermik angusineq.

b) immikkoortortami Kalaallit Nunaanni angerlarsimaffeqartumi, piginnittutut piginneqataassutsip annertussusaanik imaluunniit taasisinnaatitaanermik toqqaannartumik imaluunniit

toqqaannangitsumik minnerpaamik pingajorarterutinut, 50 pct.-inut, pingajorarterutinut marlunnut imaluunniit 100 pct.-imut qaffaaneq imaluunniit pissaaneqarfeqarneq, imaluunniit

c) immikkoortortami Kalaallit Nunaanni angerlarsimaffeqartumi imaluunniit immikkoortortap Kalaallit Nunaanni angerlarsimaffeqartup suliassa qarfiini ingerlatsinermut pingaaruteqartuni allakkut toqqaannartumik imaluunniit toqqaannangitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarneq kiisalu

d) Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisumik Kalaallit Nunaanni suliniummik allamik tigusineq imaluunniit aallartitsineq.

5) Aningaasaliisartoq nunamit allameersoq: Inuk, qallunaat naalagaaffianni innuttaasutut pisinnaatitaanngitsoq, imaluunniit qallunaat naalagaaffianni innuttaasutut pisinnaatitaasoq, kisianni ukiut 5 sioqqullugit Kalaallit Nunaanni aalajangersimasumik najugaqarsimanngitsoq, aamma Kalaallit Nunaannut tamakkiisumik akileraartussaataitaanngitsoq aamma ukiut ilivitsut 5 sioqqullugit Kalaallit Nunaannut tamakkiisumik akileraartussaataitaasimasoq, imaluunniit inatsisitigut pisinnaatitaasoq pisussaataitaasorlu, Kalaallit Nunaanni angerlarsimaffeqanngitsoq, kiisalu nunani oqartussaasut aamma nunani allani naalagaaffiup sullissivii.

Nunanit allanit aningaasaliinissamut akuersissuteqarnissaq pillugu qinnuteqarneq aamma akuersissuteqarnissaq pillugu noqqaassuteqarneq

§ 4. Aningaasaliisartoq nunanit allaneersoq, suliassa qarfiit immikkut ittumik malussarissuseqartut iluanni nunanit allanit aningaasaliinissap naammassineqarnissaanik siunertaqartoq, aamma suliniutit, imm. 2-mi ilaatinneqartut, aningaasaliinissaq sioqqullugu aningaasaliinissaq pillugu akuersisummik Naalakkersuisunut qinnuteqassapput.

Imm. 2. Suliassa qarfiit immikkut ittumik malussarissuseqartut aamma suliniutit, imm. 1-mi taaneqartutut Kalaallit Nunaata isumannaatsuunissaanut imaluunniit tamat toqqissisimatinneqarnissaanut tunngassuteqartut, tulliuttuni ilaatinneqarput:

- 1) Illersornissamut suliassa qarfiup iluani suliffeqarfik.
- 2) It-kkut isumannaatsuunissamut atuuffiit iluanni imaluunniit paasissutissat isertuussat suliarineqarnerannut suliffeqarfik.
- 3) Suliffeqarfik nioqqutissianik marloqiusamik atorpeqarsinnaasunik nioqqutissiortoq.
- 4) Nr. 1-imiit 3 ilanngullugu taaneqartunit allaanerumik teknikkikkut atortorissaarutit pingaarutillit allat pillugit suliffeqarfik.
- 5) Attaveqaasersuutit pingaarutillit.
- 6) Aatsitassanut suliassa qarfik.
- 7) Ingerlatseqatigiiffiit Namminersorlutik Oqartussanit pigineqartut.

8) Imerk nukissiorfiit

Imm. 3. Suliassaqarfiit suliniutillu imm. 2-mi ilaatinneqartut killilersorneqarnissaat pillugit Naalakkersuisut malittarisassanik erseqqinnerusunik aalajangersaasinnaapput.

§ 5. Aningaasaliisup nunami allameersup, nunamit allamit aningaasaliinissatut eqqarsaatigineqartup imaluunniit naammassineqartup, § 14-mi ilaatinneqanngitsup, akuersissutigineqarnissaa pillugu Naalakkersuisut noqqaavigisinnaavai.

§ 6. Nunanit allanit aningaasaliinerup, § 4-mi ilaatinneqanngitsup, aamma § 5 malillugu nalunaarutigineqarsimanngitsup, naammassineqarneranit ukiut 5 tikillugit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinersoq, Naalakkersuisut misissussallugu aalajangersinnaavaat.

§ 7. Qinnuteqaateqarneq nalunaarutiginninnerlu pillugit, matumani qinnuteqaatit digitaliusumik tunniunneqarnissaat ilanngullugu, ingerlatseriaatsit pillugit malittarisassat erseqqinnerusut Naalakkersuisut aalajangersarsinnaavaat.

Nunanit allanit aningaasaliinerit eqqarsaatigineqartut imaluunniit naammassineqartut pillugit aalajangiinerit

§ 8. Aningaasaliinernut taamaattunut misissuinikkut aamma akuliuttoqassappat akuliunnikkut, nunanit allanit aningaasaliinissaq qinnutigineqartoq imaluunniit nalunaarutigineqartoq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinngitsoq takuneqarsinnaalerpat, nunanit allanit aningaasaliinerup § 4-mi imaluunniit § 5-mi ilaatinneqartup akuerineqarnissaa imaluunniit akuersissutigineqarnissaa pillugu Naalakkersuisut akuersissuteqassapput. Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, aamma taamaattoqarnera § 9 malillugu piumasaqaateqarnikkut pakkerneqarsinnaasimanngippat, Naalakkersuisut nunanit allanit aningaasaliineq itigartitsissutigissavaat imaluunniit naammassineqarnissaa inerteqqutigissallugu.

Imm. 2. Naalakkersuisut imm. 1 malillugu aalajangiinissaasa tungaannut, nunanit allanit aningaasaliinerup, inaarutaasumik naammassineqarsimanngitsup, naammassineqarnissaa Naalakkersuisut utaqqiisaagallartumik inerteqqutigisinnaavaat.

Imm. 3. Nunamit allamit aningaasaliisup noqqaassuteqarnerata kingorna, imm. 1 malillugu utaqqiisaagallartumik akuersissuteqarnissaq pillugu Naalakkersuisut aalajangiisinnaapput.

§ 9. Aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerata pitsaaliorneqarnissaa siunertaralugu, nunanit allanit aningaasaliinerup, § 4-imi imaluunniit 5-imi ilaatinneqartup, naammassineqarnissaanut piumasagaatit Naalakkersuisunik isumaqatigiissutigineqartut, aningaasaliisartup nunanit allaneersup eqqortissallugit neriorsuutigisinnaavai.

Imm. 2. Aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerata pitsaaliorneqarnissaa siunertaralugu, nunanit allanit aningaasaliinerup, § 4-imi imaluunniit 5-imi ilaatinneqartup, akuerineqarnissaanut imaluunniit akuersissutigineqarnissanut piumasagaatinik pinngitsoornani naammassisassanik Naalakkersuisut aalajangersaasinnaapput.

Imm. 3. Nunanit allanit aningaasaliineq attanneqartillugu, imm. 1 aamma imm. 2 malillugit piumasagaatit eqqortinneqassapput. Piumasagaatit isumaqatigiissutigineqartut qanoq ilillugit qularnaarneqarnerut pillugit, aningaasaliisartup nunanit allaneersup, ukiumoortumik nalunaarusiaq nassiuttassavaa. Nalunaarusiami paasissutissat eqqortuunerat pillugit kukkunersiuisumit, Kukkunersiuisut aamma kukkunersiuinermik suliffeqarfii akuerisaasut pillugit inatsimmik Kalaallit Nunaannut atuutilersitsineq pillugu peqqussut malillugu akuerisaasumit, aamma aningaasaliisumit nunamit allameersumit attuumassuteqannginnerminik uppersaasumik, nalunaarummik nalunaarusiaq ilaartinneqassaaq.

§ 10. Ilaatigut pisut tulluittut pisimatillugit, aalajangiineq Naalakkersuisut allanngortissinnaavaat imaluunniit utertissinnaavaat:

- 1) Aalajangiineq paasissutissat eqqunngitsunik imaluunniit paatsiveerussaataasut tunngavigalugit aalajangerneqarsimappat.
- 2) § 9 malillugu piumasagaatinik eqqortitsinnginneq imaluunniit piumasagaatit pillugit nalunaarusiornissamik eqqortitsinnginneq.
- 3) § 5 malillugu Kalaallit Nunaanni immikkoortortami piginnittutut piginneqataassutsinik imaluunniit taasisinnaatitaanernik toqqaannartumik imaluunniit toqqaannangitsumik peqarnerup imaluunniit pissaaneqarfeqarnerup imaluunniit aalajangiinerni aalajangiisuusumik pissaaneqarnerup annertusineqarnerani akuersissummik peqarnissaq pillugu nutaamik qinnuteqarnissamut pisussaaffiup eqqortinneqannginnera.
- 4) § 12-imut akerliusumik aningaasaliisartoq nunanit allaneersoq paasissutissanik Naalakkersuisunut tunniussinngilaq.
- 5) Pissutsit allanngornerat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut ilungersunartumik navianartorsiortinneqarnerannik kinguneqartut.

§ 11. § 10 malillugu aningaasaliineq pillugu akuersineq imaluunniit akuersissuteqarneq utertinneqarsimappat, aamma Kalaallit Nunaata isumannaatsuunissaanut tamallu

toqqissisimanissaannut aningaasaliineq navianartorsiortitsisinnaappat, imaluunniit nunanit allanit aningaasaliineq § 8 malillugu itigartitsinermut imaluunniit inerteqquteqarnermut akkerliussimik naammassineqarsimappat, nunanit allanit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaapput.

Imm. 2. Aningaasaliisartoq nunanit allaneersoq § 4-mut akkerliussimik akuerissummik qinnuteqarsimanngippat, aamma Kalaallit Nunaata isumannaatsuunissaanut tamallu toqqissisimanissaannut aningaasaliineq navianartorsiortitsisinnaappat, nunanit allanit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaapput.

Imm. 3. Nunanit allanit aningaasaliineq § 6-imi ilaatinneqartoq, Kalaallit Nunaata isumannaatsuunissaanut tamallu toqqissisimanissaannut aningaasaliineq navianartorsiortitsisinnaappat, nunanit allanit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaapput.

Nalunaaruteqartarneq aamma paasissutissanik pissarsiniartarneq

§ 12. Nunanit allanit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerat imaluunniit Inatsisartut inatsisaat manna malillugu apeqqutit allat naliliiffiginiarlugit, aningaasaliisartumit nunanit allaneersumit paasissutissat pisariaqartinneqartut tamaasa Naalakkersuisut piumasaqaatigisinnaavaat. Paasissutissat eqqortuunerat pillugit kukkunerisuiusumit, Kukkunerisuiusut aamma kukkunerisuiuinnermik suliffeqarfiit akuerisaasut pillugit inatsimmik Kalaallit Nunaannut atuutilersitsineq pillugu peqqussut, Kalaallit Nunaannut atuutilersinneqartoq malillugu akuerisaasumit, nalunaarummik nalunaarusiaq ilaqartinneqassasoq, Naalakkersuisut piumasaqaatigisinnaavaat. Inuk, imm. 2 malillugu nalunaarummik tunniussisoq, aningaasaliisumit nunamit allameersumit attuumassuteqannginnini uppersarsassavaa.

Imm. 2. Aammattaaq akuusuni attuumassuteqartuni paasissutissanik Naalakkersuisut pissarsiniarsinnaapput, matumani ilaatigut aningaasaliisumit nunamit allaneersumit paasissutissat uppersarsarneqarnissaat siunertaralugu Kalaallit Nunaanni immikkoortortaarfimmit paasissutissat ilanngullugit, imaluunniit Kalaallit Nunaanni immikkoortortaq pillugu paasissutissat pissarsiarineqarnerat, matumani aqutsisut ilusaat aamma ingerlatsiviit suliassaqaarfigisai ilanngullugit.

Imm. 3. Inatsisartut inatsisaat manna malillugu sulianik suliarinninnermut atugassanik nunat allat oqartussaasuinik paasissutissat avitseqatigiissutigineqarsinnaanerit pillugu Naalakkersuisut malittarisassanik aalajangersaasinnaapput.

Nakkutilliineq aamma tamanut saqqummiussineq

§ 13. Nunanit allanit aningaasaliinerit, Inatsisartut inatsisaanni matumani ilaatinneqartut, Naalakkersuisut nakkutilliivigissavaat aamma tamanna pillugu malittarisassanik erseqqinnerusunik aalajangersaasinnaallutik.

Imm. 2. Tamanna pisariaqartinneqartutut nalilerneqarpat, Inatsisartut inatsisaat manna malillugu imaluunniit tassannga malittarisassat aalajangersarneqartut malillugit, Naalakkersuisut aamma oqartussaasunit allanit sinniisut nakkutilliinnermut- aamma nakkutiginninnermut atasumik suliaqarnerminnut atugassaminnik, pisariaqartumik qanoq iliorsinnaanermut uppersaateqarlutik aamma eqqartuussivimmit aalajangiinertaqanngitsumik inuussutissarsiornermut tunngasumik ininut aamma assartuutitut isersinnaatitaapput.

Imm. 3. Imm. 2 malillugu nakkutilliinnermi- aamma nakkutiginninnermi sunniuteqarluartumik suliaqarnerup naammassineqarnissaannut, immikkoortortat aamma aningaasaliisartut nunanit allaneersut pisariaqartinneqartumik Naalakkersuisunut ikiutissapput, matumani paasissutissat attuumassuteqartut tunniullugit, inuussutissarsiornermut tunngasumik ininut aamma assartuutitut isersinnaatitsineq aamma nakkutilliiartornermi ikiuunneq ilanngullugit.

§ 14. Tamanna naleqquttutut isigineqartillugu, Inatsisartut inatsisaat malillugu nakkutilliinerup aallartinneqarnissaa imaluunniit aallartinneqarsimanera, nakkutilliinnermit inerniliussat kiisalu Inatsisartut inatsisaat aamma malittarisassat tassannga atulersinneqartut malillugit aalajangiinerit, Naalakkersuisut tamanut saqqummiussinnaavaat.

Akiliut

§ 15. Aningaasartuutitut, Inatsisartut inatsisaat manna aamma malittarisassat tassannga atulersinneqartut malillugit oqartussaasut suliarinninnerannut atassuteqartunut, akiliutit akilerneqarnissaat pillugit Naalakkersuisut malittarisassanik aalajangersaasinnaapput.

Pinngitsaaliissummik taarsiissutitalimmik pigisanik piginnikkunnaarsitsineq

§ 16. Inatsisartut inatsisaat manna malillugu iliuusissat naammassineqarnissaannut pisariaqartinneqartumik annertussusilimmik, namminerisamik pigisanik pinngitsaaliissummik taarsiissutitalimmik pigisanik piginnikkunnaarsitsineq Naalakkersuisut aallartissinnaavaat.

Imm. 2. Inatsit manna malillugu iliuutsit naammassineqarnerat pinngitsaaliissummik taarsiissutitalimmik pigisanik piginnikkunnaarsitsinerusumik akuliunneruppat, piginnittumut imaluunniit piginnittunut attuumassuteqartunut tamakkiisumik taartisiaqartitsisoqassaaq.

Imm. 3. Imm. 1 malillugu pinngitsaaliissummik taarsiissutitalimmik pigisanik piginnikkunnaarsitsinermi suleriaaseq pillugu malittarisassanik erseqqinnerusunik Naalakkersuisut aalajangersaasinnaapput.

Attaveqatigiinneq aamma oqaatsit pillugit piunasaqaatit il.il.

§ 17. Akuersissuteqarnissaq pillugu qinnuteqaatit, nalunaarutiginninnerit, piunasaqaatit pillugit neriorsuutit, nalunaarusiat il.il., Naalakkersuisunut nassiunneqartut, kalaallisut imaluunniit tuluttut allanneqassapput, taamaattoq imm. 2 takuuk.

Imm. 2. Qinnuteqaatit tuluttut nassiunneqartillugit, aamma kalaallisut imaluunniit tuluttut nutserneqarnissaat pisariaqartinneqartoq Naalakkersuisut nalilerpatigit, taamaaliornermut aningaasartuutit qinnuteqartup imaluunniit nalunaarutiginnittup akilissavai.

Tamanut saqqummiussisussaataaneq

§ 18. Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni allagaatinik takunnissinnaatitaaneq aamma inuup imminut tunngasumik paasissutissat pillugit takunnissinnaatitaanera pillugit malittarisassat, sulianut Inatsisartut inatsisaat manna imaluunniit tassannga malittarisassat malillugit suliarineqartunut, atuutinngillat.

Iliusereriikkanut kinguneqartitsinerit

§ 19. Nunanit allanit aningaasaliineq, isumaqatigiisummit, § 8 malillugu itigartitsisummut imaluunniit inerteqquteqarnermut akerliusumik isumaqatigiissutigineqartoq imaluunniit attanneqartoq imaluunniit § 11 malillugu naalakkiutigineqartumut akerliusumik isumaqatigiissutigineqartumik tunngaveqartoq, akuusut akornanni atuuttuussuseqanngilaq.

Imm. 2. § 11 malillugu atorunnaarsitsinissaq pillugu § 8 malillugu itigartitsineq imaluunniit inerteqquteqarneq malinneqanngippat, Kalaallit Nunaanni oqartussaasumit akuersissut suugaluartorluunniit, nunanit allanit aningaasaliinermi suliniummut tunngassuteqartoq, Naalakkersuisut atorunnaarsissinnaavaat.

§ 20. § 11 malillugu nunanit allanit toqqaannartumik aningaasaliinerup atorunnaarsinneqarnissaa pillugu naalakkiut malinneqanngippat, suliffeqarfimmi Kalaallit Nunaanni najugaqartumi, aamma nunanit allanit aningaasaliisup pineqartup naalakkersugaani, piginnittutut piginneqataassutip taasisinnaatitaanermut attuumassuteqartup atorunnaarsinneqarnissaa, Danmarkimi Erhvervsstyrelsimut Naalakkersuisut innersuussutigisinnaavaat.

Atortuulersitsineq

§ 21. Inatsisartut inatsisaat manna 1. januar 2026 atuutilissaaq.

Imm. 2. Nunanit allanit aningaasaliinernut, inatsisip atuutilinnginnerani naammassineqartunut, Inatsisartut inatsisaat atuutinngilaq.

Namminersorlutik Oqartussat, ulloq xx. xxx 2025

Naalakkersuisut Siulittaasuat